

November 4, 2019

www.awemainta.com

www.facebook.com/awemainta

noticia@awemainta.com


583-1400



AWEMainta

15
año

Auto "For Sale" a kima of a ser kima



= exact

Solutions for Finance, Manufacturing,
Wholesale Distribution, Professional
Services, HRM, CRM and BPM

Business Processes

Marketing, Sales and Service
Logistics & Supply Chain Management
Reporting & Compliance
Planning & Production
Finance & Accounting
Project Management

Supporting all

your business activities

Our goal is to understand and anticipate your business
requirements. It means that everything we do is
geared towards equipping you with solutions that
will help you succeed as markets evolve

VCC
International NV

Exact. And it all comes together. Tel: 583-7072 | info@vcc.int.com | www.vcc-int.com



We don't just say it ... We Guarantee it !!!

**INVEST
SECURE**



*Nos ta ofrece tranquilidad,
protehando nos comunidad.*

Pa mas informacion yama 582-7252

DIASABRA anochi pa mas o menos 7:45 Polis y Bomberonan a ser manda pariba di Excelsior Casino na Holiday Inn.

Eynan tabatin un auto na candela. Na yegada di Bomberonan mesora nan a cuminsa combati e candela, cu tabata concentra parti dilanti. Tabata trata aki di un Hyundai Accent color blau cu tabatin "For Sale" riba dje. Kico lo por a causa e candela no ta conoci ainda.

Cinco aña pidi pa homber cu a viola su ex pareha y mama di dos di su yiunan

DIA 22 di november awo Robert Maduro, contra kende fiscal a pidi un castigo di 5 aña y cual a cay manera un baño di awa, lo haya sa si Corte ta conden'e segun demanda of no.

Maduro tin acusacionnan serio contra dje manera menasa, maltrato y violacion. Acusacionnan cu e ta nenga di a comete.

E tabatin diferente acusacion contra dje: riba 8, juni, 2018 el a maltrata y menasa su ex pareha Liuw; algun dia despues, 13 di juni, el a viola e señora, y na di dos lugha maltrato cu henger y expresando menasa; dia prome di juli, 2018, un biaha mas el a viola e muhe, segun e acusacion. Ta trata aki di mama di su dos yiunan mas chikito. E tin total 7 yiu, di cual e dosnan mas grandi tabata presente den sala hunto cu su rumannan pa dun'e apoyo.

Tur cos ta pasobra e homber, y e mes ta admiti esey, di ta super jaloers. E tin sospecho of miedo cu su ex pareha a lague pasobra e lo tin otro hende. P'esey e menasanan a cuminsa cay, unda cu el a expresa di lo mat'e y mata e otro homber, si esey ta e caso. Pero e acusado ta nenga di a haci e menasa di morto.

Despues di e separacion, e homber a keda persigui e muhe, segun e denuncia, te cu el a haya su mes obliga di acudi na Polis pidiendo nan papia cun'e pa e lague na paz. Un biaha cu el a bay Polis tabata net momento cu e acusado Maduro a yam'e menasando di kima e casi si e no tene relacion sexual cun'e. E stalking aki ta motibo cu e muhe mester a muda temporalmente y a bolbe su cas te ora cu Maduro a keda deteni.

Meymey di tratamento di e caso, emocion a cuminsa domina e homber y el a cuminsa yora, expresando arrepentimento, pa e forma con el a trata e muhe cu su jaloezi pero e ta keda persisti di no a haci menasa ni viol'e. E famianan di e acusado, tambe tabata hopi tristo y tabata yora.

E ta admiti si cu e ta rabia hopi lihe, alsa su bos y el a yega di pasa e muhe dos klap na su bil pero mas leu cu esey no. Su ex kende tabata den Corte pa medio di e Abogado a haci un demanda di un poco mas cu 8 mil florin, pa gastonan cu e mester a haci pa sobrepasa e situacion cu el a pasa aden y e diferencia di huur ora cu e mester a bay biba temporalmente otro caminda.

E acusado mes a bisa cu e tin pensa di bay for di Aruba. E lo keda dos aña pa caba di paga su debenan y djey e lo bay. E lo cria su yiunan si y si e sali liber, e ta bay haci tur cos via di Voogdijraad pa evita contacto cu e muher.

Fiscal ta haya cu e acusacionnan ta proba y a bisa cu loke e acusado a haci cu e muher ta un falta di respet pa e ser femenino. E pruebanan t'ey y convincente. Mirando e seriedad di e delito, aunke cu nunca el a haya su mes involvi cu husticia, a pidi un castigo di cinco aña.

Tanto acusado como famia a spanta pa e demanda. Pero dia 22 di november lo haya sa kico Corte ta pensa di esaki.

Hues, despues di a scucha defensa di mr. Griffith a sera tratamento di e caso y a bisa cu dia 22 November 2019 lo tin sentencia

Caso asesinato posponi te cu 14 di februari

DIABIERNA Corte di Prome Instancia tabatin riba rol e caso di asesinato cu a tuma lugha den luna di april, pero esaki a keda posponi.

E acusacion contra Aurelio Dirksz ta cu riba 23 di april di e aña'ki, el a mata e mama di su yiunan, esta sra. Kock. E caso su tratamento sinembargo no a sigui pa motibo cu Abogado di e acusado a splica cu e procesverbaal falta informacion. Mirando e seriedad di e caso, nan kier pa psiquiatra haci un quick-scan di e situacion mental di e acusado.

A base di esaki lo mira si mester di un rapport mas profundo di e profesional aki.

Debi cu tin duda cu esaki por keda cla den un periodo cortico, a dicidi pa pospone tratamento di e caso te cu 14 di februari di otro aña.

Tabatin diferente miembro di famia di e victima presenta y tambe e representante di famia di e victima, kendenan kier entrega un demanda di daño material y inmaterial.



EDITORIAL

Ministerio Publico y Parlamento converti den payasonan di circo politico



Pa: Victor (Toko) Winklaar

DOS di e institutonan principal di nos sistema legal ta pasando den un desaroyo hamas bisto den historia politico di nos pais y hasta nos por bisa den esun di Reino Hulandes.

Primeramente nos tin e instituto asina cardinal, asina importante p'e fundeshi di un democracia limpi y sigur, cu ta Ministerio Publico, cu ultimo añanan a permiti su mes di wordo manipula pa sirbi interesnan politico partidista, sin cu sikiera por a mira e instituto aki lanta para y mustra cu e no ta permiti su mes wordo usa como instrumento politico.

Ya caba henter e proceso den caso di ex Minister Paul Croes ta conoci caminda a gasta miyones pa traha un tipo di 'Lego-Case' contra di e ex mandatario, violando na varios ocasion y den diferente forma su derecho como ciudadano liber di un pais liber y awor e mesun trayecto ta wordo sigui den caso di miembro di fraccion di AVP, sr. Benny Sevinger.

Den e caso di Benny Sevinger ta realmente un misterio grandi, con Ministerio Publico a drenta accion riba keho entrega pa dos miembro Parlamento di fraccion di MEP contra di e mandatario aki, hasta a bay over na drenta su cas y otro casonan di otro nombrenan cu a wordo menciona, mientras cu otro caso a wordo poni un banda y no a wordo atendi pa Ministerio Publico.

Aki nos ta referi na kehonan entrega pa colmo algun colega Minister di un actual Minister di Gabinete Wever Croes, esta Minister Otmar Oduber, mas cu tres aña pasa, pero cu nunca a wordo atendi y investiga.

Si e argumento ta cu e denunciante a pidi pa seponer a caso aki anto ta lanta e discusion si legalmente esaki por wordo haci sigur si e denunciante a presenta evidencia legal di culpabilidad di e mandatario aki.

'Klasse justitie' ta un expersion serio, un expresion hopi grandi pa culpa Ministerio Publico di esaki, pero ta un hecho cu no por conclui otro si Ministerio Publico mes voluntariamente ta permiti su mes wordo usa di e forma aki.

Con bin OM ta bay over bou presion politico di gobernantenan pa bay investiga un caso contra un ex Minister di e gabinete anterior, mientras cu tin acusacionnan cu a wordo entrega contra un Minister actual pa gobernantenan actual den e mesun gabinete aki contra su persona y no a mira lus di dia ainda.

Claramente esaki ta confirma cu Ministerio Publico ta mustrandu un debilidad sumamente peligroso y ta duna e impresion pa no bisa algo mas serio, cu e por wordo manipula, e por wordo presiona y politicamente e ta presta su mes p'e tipo di maniobranan aki.

A drenta cas di e ex Minister aki y miembro di Parlamento actual, a confisca cantidad di material, a bay over na saca e Minister y famia for di su propio cas pa Oficialnan di Ministerio Publico haci nan investigacion, loke a pasa cu ex Minister Croes tambe, y ta mas cu claro cu casi sigur a pone aparatonan pa sigui di cerca tur loke ta wordo papia den e cas di Parlamentario Sevinger.

Si esaki ta berdad ta di resa na Dios cu esaki lo no t'e caso "atrobe" ya cu e proceso aki ta liña recta contra derecho di tur ciudadano riba su privacidad, sigur ora cu ainda no tin ningun indicacion cu algo contra ley of un crimen mayor a wordo cometi.

Pa loke ta Parlamento cu ta nos Consejo Legislativo mas halto cu nos conoce, esaki pa algun luna caba a wordo converti den un tipo di circo politico caminda e figuranan eligi pa pueblo pa ta su representantenan den e Consejo aki, a wordo converti den 'tweederangs' Parlamentario, cu simplemente tin cu sacudi nan cabes y pa loke ta mas serio ainda, no conoce nan poder y derecho como miembronan di Parlamento.

E devaluacion aki a inicia caba ora cu Gabinete Wever Croes a hunga un wega baho cu e tres fraccionnan cu ta sostene Gobierno, dunando sosten pa un 'amienda' pa pone CFT buitenspel den henter e proceso di supervision di finansa publico, pa despues dicidi di pone e ley aki un banda ya cu e ta liña recta contra e decision di Parlamento cu t'e organo cu ta hefe di Gobierno.

Diabierna ultimon Parlamento a alcanza otro nivel destructivo y ridiculo ora cu a tene un reunion caminda a dicidi di e miembro di fraccion di AVP, Benny Sevinger no por biaha pa Panama pa asisti na un reunion di Parlatino ya cu e ta formando parti di e investigacion avestruz.

Pues aki e organo legislativo mas halto di nos pais a mustra con cla con e miembronan cu a sostene e argumento aki, simplemente no tin nocion di kico ta nan trabou y no tin un benul di loke nan ta haciendo.

Den ningun sistema legal y democratico bo por condena un ciudadano liber cu ainda no tin no tin ningun indicacion cu e ta culpabel di algo malo y preveni e ciudadano aki di su derecho pa colmo como miembro legal di e Consejo Legislativo aki.

Esaki ta otro caso cu lo lanta hopi pregunta aya na Den Haag ya cu no ta forma di ridiculisa e proceso legal di nos pais y t'e tipo di cosnan aki ta pone cu den Tweede Kamer tin un miembro cu a lanta bisa cu ta mihor pa Hulanda tuma over e sistema hudicial di nos isla.

Tanto ridicules, tanto payasada, tanto inhusticia ta birando di mas!!!!

Status di Fiber Pa Bo Cas:

E siman aki Gobierno mester tuma decision pa honra e petitionnan di Digicel

Si no tuma decision prome cu 7 di november lo tin dwangsom pa dia y daño y perhuicio den miyones



DEN e ultimo dianan aki diferente hende ta acerca mi riba caya cu e pregunta si Digicel a keda cla cu e permiso pa Fiber Pa Bo Cas? Un otro pregunta ta: Ki beneficio esaki lo tin pa nos? E prome contesta ta cortico. No, ainda no. Riba e di dos pregunta mi por elabora”, asina mr. Lincoln “Dello” Gomez, presidente di Digicel Aruba a duna di conoce den un mensahe di video dirigi na comunidad.

E ta sigui bisando: Awendia nos no por imagina nos bida, ni personal ni profesional, sin di ta conecta cu otro y cu mundo. E telefon pega na e muraya di cushina na cas ya no t’ey mas. Awe nos ta E-mail, SMS, Whatsapp, Telegram, Messenger y mucho mas pa comunica cu otro. Tur esaki tawata parti di e evolucion y desaroyo cu mundo a pasa y ta pasando aden. Esaki pa nos di un parti a wordo stimula y a bira accesibel desde momento cu na 2003 Digicel a bira parti di e comunidad di Aruba y a cuminsa ofrece un alternativa pa comunicacion mobil.

Ora esaki a pasa, henter Aruba a nota con e nivel di producto, servicio, variedad y eficiencia a subi y di otro banda prijsnan a baha. Nos tur a sinti e beneficianan! E impacto economico tambe tabata y ta visibel te cu dia di awe.

Nos trabou awendia mas y mas ta den e “Cloud” y menos riba papel. Esaki por cierto ta yuda nos medio ambiente. E dependencia riba Internet of “Cloud” aki ta visibel ora tin un interupcion di coriente of Internet. Sistemanan ta cay y trabou ta dal para di biaha. Duana ta un bon ehempel cu ta funciona full online. Sin coriente of Internet, carga no por wordo saca di waf. Sin e carga aki e mayorista, e supermercado, e restaurant ni e hotel por haya producto.

Consecuentemente esakinan ta trece stagnacion di inmediato pa nos economia. P’ese y ta importante pa tanto sector publico como tambe sector priva, nos scolnan, pa tin un infraestructura adecua di comunicacion di cual ta uza mas cu un operador, mas cu un sistema di back-up pa por mantene e sistema funcionando den un forma optimal of minimalisa e riesgo di cualkier “down time”. Esaki ta conta specialmente pa nos sectornan critico manera nos sistema bancario, aeropuerto, waf, departamento di impuesto y tur otro departamento publico cu tey pa sirbi comunidad. E infraestructura ta algo indispensable pa cualkier iniciativa di e-government y pa duna e sector priva espacio pa sigui desaroya.

Aruba mester por ofrece servicio di Fiber Pa Bo Cas na comunidad. Dicon?

Pasobra esey lo brinda conectividad y capacidad cu velocidadnan di mas cu 100 biaha compara cu e sistema tradicional basa riba waya di koper of mobil. Ta demostra mundialmente cu Fiber pa bo Cas tin un impacto positivo directo ariba e crecimiento economico. “E futuro di Aruba ta fiber bou di tera”, segun Dello Gomez.


Cifranan ta muestra cu un crecimiento di den acceso na conectividad di Fiber Pa Bo Cas ta hiba na un crecimiento directo den GDP di un pais. Si na Aruba nos logra mita di esaki pa aña mes nos ta papia di un impulse signifcante pa nos economia.

E crecimiento aki lo no bay a costo di fondonan publico of tin un impacto riba e presupuesto di nos pais. Esaki pasobra e Fiber Pa Bo Cas ta un inversion priva. Parti di beneficio aki ta inclui trabounan cu Fiber Pa Bo Cas ta trece cu ne cu por crea oportunidad pa graduadonan di EPI Ciencia & Tecnologia, Economia, Scol Pa Ofishi, MAVO, HAVO, VWO, Facultad Economico Financiero di Universidad di Aruba sin conta e hands-on-the-job-training cu otro contratistanan of dunadonan di servicio lo sa di duna.

“Nos Arubiano semper tin miras pa futuro, nos ta mira mas dilanti y ta p’ese y nos lo sa di adapta Fiber Pa Bo Cas pa haci nos pais Future Proof. Nos mester ta cla pa implementa tecnologia nobo of nos lo stagna nos desaroyo y esun di nos yiunan. Lo no por implementa desaroyo manera 5G y centronan di data (“Data-Centers”) si nos como pais no tin e infraestructura adecua. Tampoco e consumidor no lo hanja mas calidad y servicio pa su placa”, di acuerdo cu e presidente di Digicel Aruba.

Na momento cu Digicel haya e permisionan necesario, Digicel lo duna di su parti y hunto mira Aruba tuma un paso importante pa futuro y cu lo cuminsa prepara pa haci Aruba “future proof”, asina Dello Gomez a finalisa su mensahe.

Ilegalnan gara riba lama yegando Aruba



DIADOMINGO marduga personal di Kustwacht a capta señalnan poco straño riba lama y sigur no tabata señal di ayudo. A resulta cu tabata trata di intento pa Venezolano-nan drenta Aruba di forma ilegal.

Ora cu e boto riba lama tabata trata di haci contacto cu esnan na Aruba cu mester recoge e grupo yegando for di Venezuela. Asina cu a mira cu ta trata di haci contacto, personal di Kustwacht a bay direccion di e boto sospechoso cu tabata direccion pa Aruba, banda pazuid. E direccion cu e tabata bayendo no tabata un waf legal. Kier a bay den direccion di un area conoci cu ta baha hende cu ta drenta den forma clandestino.

Ora e Metal Shark a yega cerca di e boto di sorpresa, a topa 7 persona abordo, tur Venezolano. Cu e seguridad necesario a paralisa tur hende abordo di e boto tipo peñero color blauw cu un motor di 75 Horsepower. Despues cu tur cos tabata bou di control a trece e boto aden y asina cuminsa e proceso di investigacion.

E capitan a keda deteni y polis tambe avisa. E boto ta confisca pendiente investigacion. Trabounan ta sigui den forma intensivo unda Kustwacht ta traha hunto cu Polis y Douane pa garantisca cu nos fronteranan ta protegi. Ultimo tempo tin mas intento di pazuid pa yega Aruba pero danki na e bon trabou di Kustwacht ta impedi tur e intentonan ilegal aki.



The easy way to pay

Cumpra, Order, Paga y Manda Placa
cu bo celular.








Bishita www.pay.aw pa mas informacion.

Scan pa download



LabHOH modernisa, pero ainda ta sinti consecuencia di e fraude cometi

SIMAN PASA laboratorio di hospital, esta LabHOH tabatin un conferencia di prensa pa presenta e desaroyonan nobo pa cu Departamento di Pathologia. E modernisacion mester percura pa un mehoracion di calidad y haci e servicio mas eficiente. Nan ta traha pa wordo acredita y asina recupera su credibilidad. Pero loke ta persigi nan t'e caso di fraude pa cual no tin claridad ainda. Loke si sa ta cu tur e testnan, e.o. pap-testnan haci, mester wordo haci di nobo.

E modernisacio di division di Pathologia ta den full swing, asina e team-leader di dicho division, Cyrielle Lacle a duna di conoce. E aparatonan nobo y e sistema mas moderno a keda introduce y e digitalisacion ta tumanando lugar. E pacientenan tambe lo tuma nota di esaki, pasobra awor nan resultadonan lo keda cla mas liher y entrega. Asina a corta den e tempo di espera.

Pa traha riba e certificacion di Consejo di Acreditacion Hulandes. Relaciona cu esaki, Hospital a contrata dr. Dennis Rupa, un patologo Hulandes, kende tambe mester yuda den conduci LabHOH n'e acreditacion cu su consehonan.

PAP-Test

E fraude na Laboratorio a keda descubri y den su mayoria a ser haci cu e PAP-Testnan, cu Departamento di Patologia mester a ehecuta. E testnan aki ta ser haci na Aruba mes, pero ta wordo manda afo (Corsou y Hulanda) pa determina su e dama tin celnan di cancer na su baarmoeder.

E investigacion forensico haci den e caso di fraude a pone cu masha test a surgi. Den hopi caso a resulta cu no tin claridad. Ta masha hende muher ta wardando asina riba nan respectivo resultadonan tin caso unda otro pacientenan cu a haya resultado cu no ta coresponde cu nan mesun test.

Director di Dr. Horacio E. Oduber Hospital, Ezzard Cilie, kende tambe tabata n'e conferencia di prensa siman pasa a confirma cu berdaderamente tin 2385 PAP-Test sin a keda investiga. Y tin tur indicacion cu mester haci tur e testnan aki di nobo. Tur esaki por tuma 4 luna pa haya resultado nobo. Pero kende ta responsabel p'e mal trabao aki, of p'e fraude cometi?

FORENSICO

Te awor tin un resultado pre-eliminar, unda Ezzard Cilie a recibi esaki den un raport di 250 pagin, Pero cu e raport final lo keda cla den 2 siman di tempo. For di e raport final aki, HOH lo mester por determina, kende(nan) ta responsabel p'e daño causa di como 400 mil euro.

Tambe Ezzard Cilie a admiti cu HOH tin 7 abogado y e dos personanan suspendi tin nan respectivo abogado, pa bringa e caso aki huridicamente den Corte proximamente.

ACREDITACION

Ultimo tempo tin diferente laboratorio Arubano cu a dicidi di pone mas atencion na acreditacion di nan respectivo laboratorio. Dentro di poco IMSAN lo cuminsa tambe cu su propio laboratorio, pa cual nan tambe ta buscando nan acreditacion.

Lo mester bay na revisa keda acreditacion ya recibi, pa determina si nan ta cumpli cu standardnan mundial.

Pesey mes LabHOH awor, cu tin diferente division kier haya acreditacion di e prestigioso Consejo di Acreditacion Hulandes. Te awor e unico laboratorio cu tin e acreditacion Hulandes aki, ta Laboratorio di Servicio.



Bomberonan rabia pa forma con a scoge esnan pa sigui curso

DEN forma sorpresivo diadomingo mainta Bomberonan a bay den accion pa muestra nan malcontento cu un decision tuma door di Minister di Husticia Andin Bikker pa dos persona cu ta bay sigui un opleiding den exterior.

Unabes cu e decision aki a bira conoci, e Bombero a tuma contacto cu nan sindicato SINBA cu a dicidi cu ta bay den un accion di un ora pa muestra nan malcontento y exige e mandatario splicacion.

E preocupacion of malcontento di Bomberonan aparentemente ta debi na e hecho cu niun momento nan tabata na altura di e posibilidad habri pa sigui un opleiding. Tin un procedura cu mester sigui ora cu ta habri e posibilidad pa sigui curso. Sinembargo den e caso aki ta parce cu e hendenan cu ta bay e curso, cu ta dos officier, a wordo scogi directamente. Algo cu e Bomberonan no tabata di acuerdo cun'e.

Un mey ora cu e Bomberonan tabata den accion, e Minister a yega pa sinta na mesa cu e sindicato. Nan a drenta paden cu tur e Bomberonan y e sindicato, den un encuentro cu a dura largo toch.

A dicidi cu e mandatario ta bay busca informacion, combersa cu gerencia di Brandweer y lo sinta bek na mesa cu sindicato.

E accion no a afecta e operacion di Brandweer.



ANUNCIO

Fee Increase

In an effort to promote fee transparency, we have published an updated Fee Schedule for the convenience of our customers.

There will be an increase in some banking fees as of December 1, 2019, when transaction is conducted manually at one of our Tellers or Receptionists. Our Self Service payment options will remain free of charge, available using our Aruba Bank Online, Aruba Bank App, Customer Service Kiosk and Smart Deposit Machine.

Visit our website for the updated Fee Schedule: www.arubabank.com/aruba-bank-fees-2019
For additional information or questions, please call our Contact Center at (+297) 527-7777.

Truly yours,
Aruba Bank N.V.

Aumento di Tarifa

Den nos esfuerzo pa promove transparencia, Aruba Bank ta publica un "Fee Schedule" nobo, pa conveniencia di nos clientenan.

Desde 1 di December 2019, nos lo introduci algun aumento di tarifa, na momento cu e cliente scohe pa haci un transaccion manual na un di nos caheronan of recepcionista. Alabes, nos lo sigui ofrece e opcion pa haci pagonan sin costo adicional, ora di usa un di nos metodonan "Self Service": Aruba Bank Online, Aruba Bank App, Customer Service Kiosk y Smart Deposit Machine.

Bishita nos website pa un bista completo: www.arubabank.com/aruba-bank-fees-2019
Pa mas informacion of pregunta, por yama nos Contact Center na (+297) 527-7777.

Atentamente,
Aruba Bank N.V.

Arubabank®

Explosion di gas a laga un persona herida



DIASABRA ultimo tabatin un incidente di explosion di gas na Palm Beach cu a laga un persona di edad herida. Casi 11'or di mainta a drenta melding di un explosion cu a laga un persona herida, na un cas na Palm Beach. Mirando e forma cu e melding a drenta, tanto Polis como Brandweer a bay hopi rapido pa e sitio. Na yegada a constata cu no tabatin candela, pero si a topa cu doño di e cas, un señora grandi caba sinta pafo. Ademá di e susto, e señora tabata keha di dolor na diferente parti di su curpa y paramediconan a cuminsa atende.

Bomberonan a cuminsa pa verifica si e boter di gas ta cera y despues a bay paden pa mira unda e accidente a tuma luga. E señora a splica nan cu el a bay cende e stoof ora cu e explosion a tuma luga. Door di forsa di e explosion, e stoof a pusha bin dilanti dal den e señora. Pero lesion di kemadura mes e señora no a ricibi.

Bomberonan a constata cu unda e explosion a tuma luga, esaki a crea un buraco grandi den e muraya, mientras cu e cushina a keda total loss. E señora tabatin hopi suerte, ya cu su lesionnan por tabata hopi mas grave mirando e intensidad di e explosion y e daño material cu el a causa. Ambulance a transporta e herido pa hospital.

Sin a ser condena ainda

Un Comision Central no kier pa Benny Sevinger bay reunionnan di Parlatino

DIABIERNA merdia, Parlamento tabatin un reunion di Comision Central cu e punto pa discuti e baymendo di reunion di Benny Sevinger pa atende un reunion di Parlatino.

Tabata Benny Sevinger, hunto cu Arthur Dowers tabata den noticiero di Den Noticia na Galactica FM, unda ambos a ser entrevista pa Toko Winklaar y Simon Arends, conductornan di dicho noticiero.

Tanto Benny Sevinger como Arthur Dowers a muestra cu Parlamento ta fout bezig, pasobra siendo un representante di pueblo, hamas nan por priv'e di atende un reunion. No tin un ley cu por prohibi un Parlamentario di atende un reunion.


Fraccion di MEP y POR mester compronde cu nan no tey pa mas cu 2 aña mas, y cu despues di proximo eleccion, lo conoce cambio y hopi di esnan cu vota awe, lo no ta bek den Parlamento.

Te awe Benny Sevinger ta un sospechoso, siendo den fraccion di MEP no tin solamente algun sospechoso di viola un of mas ley, pero hasta tin e lider di fraccion, kende tin un condena di Huez. Y awe nan kier pasa di ta "santo".

E prohibicion di Benny Sevinger pa biaha, no tin ley pa Parlamento por para riba dje. E hecho aki no a caba aki, y lo sigui bringa e prohibicion aki, no pa kier biaha, pero pa haci algo di principio. Lo informa Gobernador di e violacion di ley aki.


Manera Benny Sevinger a duna di conoce, Endy Croes kier biaha, pero poco biaha e ta atende e reunionnan mes.








The easy way to pay

Shop, Order, Buy, Transfer,
and pay using your mobile phone!





Scan to download

Visit www.pay.aw for more information.

Chauffeur di Hit & Run deteni na su cas



DIASABRA den oranan di merdia a sosode un caso di hit and run na e crusada panort di e Panaderia Huchada.


Un cabayero di edad den un Daewoo bayendo direccion nort a wordo sorprendi pa un Kia Serato color licht blauw cu a sali su dilanti rancando bumper di su auto.

Un chauffeur cu lo a mira kico a pasa mesora a sigui e Kia y tawata avisa polis di e situacion.

E chauffeur cu e hit and run a tuma caminda bayendo zuid, y a yega su cas na Macuarima y parkeer e Kia den cura manera nada un pasa.

Agentenan mesora a bay e adres cu e testigo a duna nan. Eynan despues di algun investigacion a bay over na detene e chauffeur cu a comete e hit and run.

Dama haya na soño riba caya





DIASABRA den oranan di marduga algun persona pasando den Oldenbarneveldstraat a nota un dama drumi ariba acera. Mas cu claro mesora a avisa polis.

Tawata diasabra pa mas o menos 1:00 a.m cu polis a wordo notifica di un dama ariba acera. Algun persona pasando eybanda a trata na wak kico pasa e señora, cu tawata drumi ariba su banda y su tas uza pa cusinchi. Nan a purba lant'e pero nada. Pero, manera polisnan a yega of e lo a scucha zonido di e auto el a lanta mesora. Agentenan a papia cun'e pero mirando cu e ta bou influencia nan no por a saca afo unda e ta biba.

Pa e motibo aki a pidi Transportwagen pa hiba e dama warda y ora e bin bij elo por bay su cas. Ariba caya e no ta sigur. Segun nos a compronde no ta prome biaha cu polis a topa e dama aki asina aki, indicando cu elo por tin problema cu alcohol.

Accidente a laga algun cas na Sta Cruz sin coriente



DIADOMINGO algo pasa di 2'or di marduga, un dama tras di stuur di un Chevrolet Aveo, bayendo direccion di e rotonde Santa Cruz, un poco pabou di e rotonde a perde control y a dal contra un palo di luz. E impacto tabata fuerte cu esaki a pone e wayanan di coriente spart candela, mesora a avisa polis.

Na yegada en berdad polisnan a topa cu e dama chauffeur, e dama tabata mustra poco bou influencia, mesora nan a lague supla y e dama chauffeur a supla un tiki di mas, pero mirando e daño material na e auto y na e palo di luz, e polisnan a dicidi di pidi pa presencia di ambulance, pa haci un chekeo medico cu e dama chauffeur.

Despues cu e paramediconan a controla e dama, polis a hiba e dama pa warda di polis.

Polis a pidi pa presencia di ELMAR na e sitio, pa atende cu e wayanan cu a cay y tabata spart candela, esaki a causa cu algun cas den e bisindario a keda sin coriente.

LOCALIDAD NOBO

POLICLINICA DI PULMON



- Dr. S. Kock
- Dr. A. Schwengle
- Dr. C. Becker

Orario di servicio:


Dialuna - Diabierna
8:00 AM - 5:00 PM



dr. J.E.M. Arends # 9
tel.: 527-4370




Homber agresivo a hinca cacho den Panamastraat



DIADOMINGO pasa di mey anochi polis a bay un adres den Panamastraat, unda un homber lo a abusa di un cacho door di hink'e un of mas biaha cu cuchiu. Esaki tawata informacion cu polis a ricibi y mesora a bay e adres.

Na yegada polisnan a haya sanger ariba acera y mas area.

Ey nan a bin topa cu e homber cu mirada straño y agresivo. Segun nos a compronde elo kier a ataca agentenan cu e cuchiu. Aki ta unda a pidi mesora pa refuerso.



A logra domina e homber aki na yegada di mas polis y pone den boei. Na e momento ey no por a bisa ariba ki sorto di substancia elo tawata ta. El a wordo transporta pa warda di polis pa crueldad cu animal.

Accidente cu hopi daño material den Caya Jose Geerman

DIADOMINGO mainta pa mas o menos 10'or un accidente basta serio ta sosode altura di Johnsons Supermarket.

Un auto saliendo di e caya pariba di e supermarket no a calcula velocidad di e auto biniendo pariba.

Polis y ambulance a cuminsa bay e direccion, unda cu un Nissan Sentra a dal contra un Toyota Yaris cu a sali for di pariba di e supermarket.

Mester remarca cu e Sentra tawata coriendo cu velocidad hopi halto ora el a dal'e Yaris. Asina mes chauffeur di e Sentra a lastra un brake tratando di evita un dalmento, pero sin resultado.

E Sentra a dal contra e Yaris den banda, pero debi cu e Yaris ta RHD niun hende a resulta herida, pero chauffeur di e Sentra si a resulta herida y mester a haya tratamiento medico.

Paramediconan a atende cun'e na e sitio.

Takelwagen a presenta y mester a move ambos auto cu a keda hopi destrui.



Brommer horta na San Nicolas haya na un adres na Madiki, un persona a keda deteni



DIADOMINGO merdia Polis a bay un adres na Madiki pa un cuestion di brommer horta. N'e adres aki ta biba un persona cu ta spuit brommer, bais y auto.

E brommer aki lo a wordo horta algun dia atras na San Nicolas. Polis mientrastanto a pidi un pick up pa por bay cu e brommer.

Ladron mes di e brommer no a wordo deteni ainda, pero si a bay over na detene e persona cu lo mester a spuit e brommer otro color.

Segun nos a compronde n'e sitio, un persona lo a contact e persona cu ta spuit via Facebook pa supla e brommer otro color.

El a dune e prijs y asina e deal a bay on. Parce cu e persona cu ta spuit brommer no tabata sa cu e brommer ey tabata horta.

Ora e persona cu ta spuit brommer a bay trata na contact e persona aki bek via su Facebook account e lo a wordo geblock, esaki ta version di e persona cu a wordo deteni pa Polis.



Aplicacion pa subsidio pa huur 2020

FCCA kier a recorda bo, pa bin aplica pa subsidio pa huur pa aña 2020

FCCA Eagle

Belgiestraat 2

4 November 2019 te cu 29 November 2019
8:00 AM pa 11:30 AM y 1:00 PM pa 3:30 PM

FCCA San Nicolaas

B.v.d. Veen Zeppenfeldstraat 63

16 Oktober 2019 te cu 3 December 2019
8:00 AM pa 11:30 AM y 1:00 PM pa 3:00 PM

FCCA Sabana Blanco

Sabana Blanco 66

16 Oktober 2019 te cu 27 November 2019
8:00 AM pa 11:30 AM y 1:00 PM pa 3:30 PM

Pa mas informacion tuma contacto cu e departamento di Incasso na 522-3222



Sabana Blanco 66
Been v/d Zeppenfeldstraat 63
Belgiestraat 2



522-FCCA



www.fcca.com



info@fcca.com

Prome Minister Evelyn Wever-Croes:

“Nos compromiso ta desaroya San Nicolas pa San Nicolas”



“**PA** prome biaha den historia di Aruba Consejo di Minister a reuni na San Nicolas. Riba agenda tabata tin temanan cu ta relata na bienestar y progreso di San Nicolas” segun Prome Minister Evelyn Wever-Croes.

E reunion a tuma luga hunto cu San Nicolas Business Association y algun empresarionan a wordo invita pa haci un presentacion y pa asina Gobierno haya un miho bista di e proyectonan cu pronto lo keda realisa Pariba di Brug, y pa scucha con Gobierno por yuda pa e proyectonan ta exitoso.

E reunion tabata hopi positivo.

Esaki tabata e prome di e reunionnan di Consejo di Minister na San Nicolas, y mas lo sigui.

Despues di e reunion Ministernan a bishita e oficina renoba di ATA na San Nicolas cu ta atrayendo hopi turista, e oficina hopi moderno di SETAR y Postkantoor.

Gobierno di Aruba a tene tambe un conferencia di prensa na San Nicolas pa duna un relato di e prome reunion di Consejo di Minister na San Nicolas, y pa enfoca riba proyectonan pa San Nicolas, entre otro remodelacion di caya principal di San Nicolas, hotel San Nicolas, Fast Ferry, San Nicolas Ports Authority, proyecto Baby Beach, Tourism Oriented Police na San Nicolas, renovacion di Warda di Polis, Helipad pa helicopter baha na San Nicolas, y mas importante: mas atencion pa desaroyo di San Nicolas pa San Nicolas.

Mes momento a efectua e ‘ground breaking’ di e renovacion di caya principal cu lo embecece e centro comercial di San Nicolas. Esaki lo haci mas atractivo pa empresanan establece den caya principal.

Presidente di SNBA a expresa su gratitud na Gobierno y na inversionistanan cu no a perde speransa den San Nicolas y a remarca cu e pasonan historico aki ta laga e tempo di promesa atras y ta mira awor un Gobierno cu ta cumpli y ta demostra su compromiso cu accion.



E programa piloto di 2019 ta bay tocante kico Libertad ta significa pa bo. E por trata e di dos guerra mundial na Aruba, e refinaria di Aruba of storianan mas prome den historia te den actualidad. Hoben y personanan grandi ta dialoga cu otro na Centro di Barrio Brazil. E dialogonan ta wordo modera pa Paula Engelen y documenta pa docentenan y studiantenan di IPA.

LIBERTAD TA..... ta un proyecto cu ta trata riba e nificacion di e palabra LIBERTAD pa tanto hobennan y nos grandinan. Aki ta e deseo pa saca afo kico e pensamiento ta riba e sentimiento di “sinti bo liber”, un pregunta cu lo wordo haci na nos Arubianonan den tur edad y tambe stranheronan cu recientemente a bin busca un miho biba riba nos isla. E proyecto aki ta den conexion cu e celebracion di 75 aña di e liberacion den Reino. Lo documenta henter e proceso pa asina conoce e sentimiento y pensamiento di e expresion di e palabra LIBERTAD.

E parti bunita ta, cu lo conoce storia y historia di nos Aruba di antes, durante y despues di e dos guerra mundial. Pero tambe lo conoce y documenta e sentimiento di esnan cu ta desea di ta liber pero no por, esnan cu a laga tur cos atras pa sinti nan mas liber. E sentimiento con nos grandinan a experienci’e despues di 2do guerra mundial e speransa y perspectivanan cu nos hobennan por tin pa futuro y tur den e mesun pensamiento cu e stranheronan cu recientemente a yega nos isla. Durante luna di november lo tin riba diadomingonan momento unda gruponan por bini hunto y asina trece nan pensamiento y expresion pa e proyecto aki LIBERTAD TA.

E Intercambio aki ta entre islanan Aruba, Curaçao y Amsterdam cu ta wordo teni e aña aki y den 2020. E participantenan lo traduci y pone nan historianan den tayernan di nan gusto sea ta den canto, rap, declamacion of den storia. Lo tin despues un presentacion di e tayernan aki unda lo mira e obranan final.

LIBERTAD TA...

Fundacion Muchila Creativo den cooperacion cu Cede Aruba y Music Generations ta invita bo cordialmente pa participa na e programa LIBERTAD TA.....

E ta cuminsa na Aruba den bisindario di San Nicolas na unda casi tur e encuentronan ta tuma luga den Centro di Barrio Brazil. (Tambe tin un cooperacion cu KIA na unda e hobennan lo pone nan pensamiento riba papel durante un tayer di rap) Hobennan y adultonan cu ta desea di participa por atende un di e tayernan aki na Centro di Barrio Brazil. Adhunto ta manda e schedule di encuentronan y por tuma contacto cu CEDE Aruba na 5827666 of fundacion Muchila Creativo 5924343.

PROGRAMA

LUGA: CENTRO DI BARIO BRAZIL:

03 nov. libertad ta intercambia storianan (14.30 – 17.30 or)
10 nov. libertad ta famianan ta intercambia storianan (14.30 – 17.30 or)
17 nov. tayernan di rap, (13.00 or) percussion, (15.00 or) “storytelling” (17.00 or)
24 nov. Intercambia storianan cu publico durante ART FAIR SAN NICOLAS
30 nov. LIBERTAD TA..GRAN FINALE (19.30 – 21.00)

NOS TA WARDABO! Bo expresion tambe ta conta!



MUDAMENTO PA SMART BRANCH NOBO

Nos sucursal di Wayaca Falls ta muda pa un localidad nobo:

AIRPORT BUSINESS CENTER ARUBA

(Situa den e hotel nobo na Airport)

E sucursal nobo aki lo ta un **SmartBranch** cu servicio completo y asistencia digital

Operacion di e branch nobo aki lo cuminsa:
DIALUNA 4 DI NOVEMBER, 2019

Bo Banco Amigo.

Huramentacion di 20 miembro di ARUMIL

DIARANSON ultimo tabatin un cermenonia di huramentacion na Marinierskazerne Savaneta (Aruba). E comandante di kazerne, teniente coronel di marina, Art van Beekhuizen, pa prome biaha den su funcion como comandante di marinierskazerne Savaneta a huramenta e binti miembronan di ARUMIL.

Despues cu e militarnan a conclui exitosamente nan estudio basico y avansa y a cumpli cu e exigencianan cu ta wordo pidi na un Arumiler, a haci nan promesa of huramenta. Den presencia di gobernador di Aruba Alfonso Boekhoudt.

En conexion cu un biahe di trabou na Hulanda, comandante di forsa naval pa area di Caribe, brigadegeneraal di Marina Real Peter Jan de Vin, no por tabata presente na e ceremonia.

For di Corsow tabata presente e comandante di Marinekazerne Suffisant, majoor di marina, Christ van Dinteren, unda durante diesun luna e miembronan di ARUMIL a haya nan entrenamiento. E binti militarnan a efectua nan promesa dilanti di nan colega, famia y amigonan.

Un militar ta para pa lealtad, unidad, honor y e lasonan cu Defensa tin cu Cas Real. E huramento of promesa tradicional, ta consisti di tres elemento: lealtad na e Rey, obediencia na e leynan y sumision na e disciplina militar.

Door di haci e huramento of promesa, e militar ta indica cu e ta dispuesto na duna lo mihor di dj'e y pone interes di e grupo riba su propio interesnan, cu cual e integridad y dedicacion ta inextricabilmente uni.

E siguiente personanan cu a huramenta ta:

KPLMARNAR Figaroa, J.D.I.
KPLMARNAR Hill, G.
KPLMARNAR Kerpens, C.E.
MARN 1 AR Angela, J.H.
MARN 1 AR Robert, A.I.
MARN 1 AR Thomas, R.J.
MARN 1 AR Tromp, P.B.
MARN 2 AR Abreu, F.
MARN 2 AR Bethencourt, A.J.
MARN 2 AR Croes, K.M.
MARN 2 AR Everon, E.E.
MARN 2 AR Everon, N.T.
MARN 2 AR Henriquez, J.M.K.E.
MARN 2 AR Kelly, G.G.H.
MARN 2 AR De Kort, M.R.
MARN 2 AR Lopez, A.A.
MARN 2 AR Martinez Ojeda, L.M.
MARN 2 AR Ramirez Fornez, J.J.
MARN 2 AR Thijsen, R.M.
MARN 2 AR Tromp, S.J.I.



Votacion pa nomber di planeta WASP39-b a cuminsa

DESPUES cu un grupo di hurado tawatin e dificil tarea pa pasa door di e nombrenan ricibi, nos hurado a logra saca 11 nomber cu ta cumpli cu tur e reglanan di International Astronomical Union (IAU). Por vota pa e nombrenan te cu 12 di November 2019. Aruba a haya e oportunidad pa scoge nomber di un planeta.

Space and Nature Aruba Foundation (SNAF) ta contento con e proceso di seleccion a bay, bou guia di Marian Abath (Artista di Glas), Raymundo Dijkhof (Argeoloog), Maritsa Everon (experto den lenguahe Papiamentu) y Harold Kelly (Arkeologo). E grupo di experto aki tawatin e tarea basta dificil pa selecciona e miho nombrenan cu ta cumpli cu e reglanan di IAU.

E nombrenan y nan splicacion por ser haya riba e website <http://www.spacenaturearuba.com/exoplanet-naming-competition-2019/>

Ta pidi encarecidamente pa lesa e splicacionnan bon y selecta esun cu bo ta sinti cu ta esun cu por representa Aruba mas miho cu ta posibel, paso esaki lo ta e nomber cu lo wordo uza pa e strea y su exoplaneta WASP-39 y WASP 39b.

IAU lo anuncia e nombrenan ganadonan di tur e 128 paisnan cu a participa fin di December 2019 y SNAF lo anuncia e ganadonan di prome, di dos y di tres lugha dia 18 di Januari 2020.

Pamais informacion tocante Astronomia y Naturalesa, sigui e Facebook page Space and Nature Aruba.



Minister Andin Bikker ta formalisa Landsbesluit Instelling pa KIA como Guarda nos Costa

Guarda Nos Costa ta pasa di un afdeling pa bira un Servicio riba su mes

DIABIERNA atardi Minister di Husticia mr. Andin Bikker a firma e Landsbesluit Instelling di Guarda nos Costa como di KIA. Pa Minister Bikker esaki ta algo historico unda a formalisa dos Landsbesluit di cual uno di nan ta regarda e organisacion di KIA cu tin basta aña y tempo andando.

Minister Bikker a gradici sindicatonan SEPPA y TOPA p'esaki, pasobra ta basta siman a sinta hunto riba e concepto aki pa mira con por a acomoda e deseo y recomendacion di e miembronan di e sindicatonan.

Tambe a formalisa nacemento di un Servicio nobo cu ta Guarda Nos Costa cu tambe ta historico. Pa basta aña esnan cu ta traha y a traha na Guarda Nos Costa a expresa for di basta aña cu nan no kier ta un afdeling mas, pero di ta un Servicio riba su mes.

P'e logro aki, Minister Bikker a gradici sindicatonan TOPA, SEPPA y Sindicato STA cu a representa tur miembro dignamente.

E logro aki a tuma lugar democraticamente, pasobra a busca vision di tanto e sindicato como e trahadornan di KIA, con nan kier mira e organisacion y nan deseo, pasobra ta nan ta traha eyden y asina nan a refleha esaki den e formatieplan pa loke ta nan potencial y expectativa con nan ta crece cu nan rechtspositie etc y esey ta bay cu forza retroactivo 1 di januari 2017.

Minister Bikker a gradici Parlamento di Aruba specialmente Vaste Commissie di Husticia, sr. Rocco Tjon, Presidente cu cada biaha ta recorda con ta para cu e status di e reorganisacion. Pa loke ta trata Guarda Nos Costa e dimension aki ta hopi importante pa tabata un afdeling y awor ta bira un servicio riba su mes cu su propio presupuesto.

Den cuadro di retonan cu ta experienciando e.o. cu e situacion preocupante na hermana pais Venezuela, esey ta pone cu Guarda Nos Costa ta bay den un dimension nobo.



Pa cu esaki no solamente ta cumpliendo cu e deseonan di e empleadonan pa hopi aña, pero tambe e organisacion ta haya un status profesional pa bay den un dimension. Manera ta conoci Hulanda a aloca fondonan substancial pa re-enforza Aruba su fronteranan y den esaki Guarda Nos Costa, Schipholmodel y e Dubbelmodel cu ta e ley cu a introduci 3 di juli ultimo tin un rol hopi substancial y crucial pa desplega den esaki.

Despues Minister Andin Bikker a pasa pa firma y formalisa e Landsbesluitnan cu Gobernador a firma dia-bierna mainta.

WEB Aruba ta organisa

Charla tocante awa y energia di 5 di november

KICO t'e retonan pa produci awa y coriente na un isla chikito manera Aruba? Dicon no ta genera coriente y awa solamente cu solo y biento?

E contestanan publico en general lo por haña durante un charla interesante tocante desaroyo di awa y energia mañan diamars, dia 5 di november na Teresita Center na San Nicolas.

E charla, organisa pa WEB Aruba, ta cuminsa 6.30 pm y lo dura te 8.30 pm. Esnan fascina p'e industria di awa y energia ta bon-bini, pero tambe estudiante, maestro, instancia di consumidor, di medio ambiente, tur ta bon-bini.

E charla aki ta forma parti di un ciclo di sesion di informacion pa diferente gremio den comunidad. Un di e gremionan aki ta miembronan di prensa.



Dia 31 di october ultimo a tene un Masterclass p'e grupo di prensa. Despues di e Masterclass, nan a haña un tour den plantanan di WEB Aruba. Pa posibel pregunta tocante e charla por bishita e pagina di Facebook di WEB Aruba.

Chauffeur kier bandona sitio di accidente, prome cu Polis a yega

DIASABRA maduga pa mas o menos 5:40 Polis a bay na altura di e Kazerne di Bombero na Tanki Flip.

Eybanda un Chevrolet Aveo lo a dal un pal'i luz kibra y despues lo a trata di bandona e sitio.

Aparentemente e chauffeur a bay asina leu di yama un takelwagen pa busca e auto y bay di e sitio, lagando destruccion atras n'e pal'i luz.

Algun persona cu lo a mira kico a pasa a avisa Polis. Polis cu a yega e sitio a stop e takelwagen di move cu e auto, y mesora nan a bay over na controla e chauffeur.

A usa Alco-sensor pa midi alcohol y aki ta unda cu el a surpasa e limite stipula pa ley.

El a wordo deteni n'e sitio y nan a splike su derechonan pa despues transporte pa Warda di Polis.



Refuerso pidi pa homber causando problema cerca di Misa na Dakota



DIASABRA mainta den careda di 6'or Polis a bay Dakota pariba e di Misa pa un homber haciendo fastioso.

Na yegada di Polis, nan a topa cu e homber y por a nota cu e bou influencia di algo, pero na mesun un momento e lo a bira agresivo tambe.

P'e motibo aki a pidi refuerso di mas unidad policial, si acaso cos bay for di man.

Pero esaki no tabata e caso. Polisnan a sa di domina e cabayero y tur cos a cana bon.

Transportwagen a yega y sin ningun problema a transporta e homber pa warda di Playa.

Pa prome biaha

Aruba Lions cu su Christmas Fest 1 di december awor

ARUBA Lions Club sirbiendo comunidad pa 72 aña caba, awor cu un actividad nobo p'asina nan por recauda fondo pa nan proyectonan pa comunidad, pero alabez laga tur esnan cu kier goza di e temporada pa pasa un rato den e ambiente di fin di aña cu e actividad di Aruba Lions Club Christmas Fest dia 1 di december.

Esaki ta prome biaha cu Aruba Lions Club na su propio club na Eagle cu ta situa dilanti di Eagle Tennis Club, lo bay converti e tereno aki completamente den un lugar cu ambiente di fin di aña caminda lo tin weganan pa mucha, y tambe standnan di artesanía cu productonan di Pasco, tambe tin un bar pa refresca e carganta y cu un cushina pa yena e stoma manera pan cu ham di Pasco y hopi mas.

Un actividad asina sigur lo no por falta musica y p'e dia aki lo tin presentacion di gruponan di fin di aña manera Grupo Melodia cu ya ta bon conoci cu su musica varia pa fin di aña.

Tambe lo tin presentacion di un grupo cu pa hopi aña a cosecha hopi éxito durante fin di aña y awor tey bek pa algun presentacion, ta Banda La Paranda cu sigur tambe lo pone ambiente riba e dia aki.

Pa sera e anochi di actividad lo presenta pa un solo anochi e famoso agrupacion "Originales" cu a sa di reuni un biaha mas despues di hopi tempo p'asina yuda Aruba Lions Club den su activi-

dad.

Originales sigur un grupo cu pa hopi aña a sa di lansa hopi éxito durante e temporada di fin di aña, ya ta den practica p'e anochi aki asina presentando un cantidad di tema musical hopi conoci den nan tempo.

No ta algo pa bo faya y recorda e dushi tempo cu un cantidad di agrupacion di gaita asina y mirando e actividad aki cu algun di e mihor gruponan pa fin di aña no lo spera nada otro cu un bunita festival yena cu ambiente.

Aruba Lions Club Christmas Fest lo tuma lugar diadomingo 1 di december cuminsando 3or di atardi cu musica y lo termina pa 9or di anochi.

Aruba Lions Club lo haci e gesto aki pa comunidad por festeha y manteniendo nos tradicionnan y pesey ta laga entrada completamente gratis.

P'e actividad aki kier a gradici tur esnan cu a yuda pa haci esaki posibel. Aruba Lions Club ta spera un publico grandi na su clubhuis dia 1 di december pa habri e ultimo luna di aña y drenta den e ambiente di fin di aña y asina goza di un tremendo festival di fin di aña.

Ta invita henter pueblo, yega cu famia completo bin cu bo stoel y busca bo lugar pa sinta y disfruta di e atardi/anoche aki cu un concierto di musica pa fin di aña.



Hopi premio durante anochi di “Halloween” den Stellaris Casino



NA comienso di luna di october, Stellaris Casino a lansa su promocion pa “Halloween” cu un total di 20 mil dollar na premio cash, reparti semanalmente. Yazira Javois-Feliciana, Director of Marketing and Slot Performance di Stellaris Casino, a splica cu tur siman clientenan participante por a cualifica pa un chens pa gana premionan cash. E reaccion tabata asina grandi entre e hungadonan, no solamente nan tabata clasifica tur siman pa participa pa un torneo caminda cu nan lo por a gana premionan cash, pero tambe tabata ricibi freeplay riba nan account pa por hunga riba anochi di e promocion.

“Freeplay” ta masha popular entre e hungadonan, pasobra ta hunga, ta clasifica, ta ricibi un freeplay pa hunga henter anochi y cu chens pa gana premio cash. Esaki tabata parti di e campaña durante henter e luna di october. Diahuebs ultimo, riba anochi di Halloween, a culmina cu premionan grandi y tambe freeplay pa tur cu a clasifica durante henter october.

A cera e campaña mas grandi y mas special, no solamente cu tabata Halloween, pero a conclui den un fiesta hunto cu Buleria den Stellaris Casino y tambe cu unlimited mojito estilo “All you can drink”. Tabatin un orange mojito pa tur huesped como ‘Welcome Drink’ y por a tum’e tambe como nan bebida preferi henter anochi.

Pa e luna di november ya ta preparando caba un promocion similar pa clientenan cu premionan cash basta gordo, den preparacion pa fin di aña. Manera tur hende sa, Stellaris Casino ta e unico casino na Aruba cu ta duna su clientenan e miho Xmas basket. Debi cu esaki ta popular, lo bay enfoca den luna di november, prepara su clientenan pa participa, hunga y clasifica pa por ricibi nan Christmas basket den luna di december regalo.



Parlamentario drs. Shailiny Tromp-Lee (MEP):
**“Parlamento ta demostra
 responsabilidad na
 momento cu a dicidi cu
 Benny Sevinger no por bay
 representa Parlamento di
 Aruba den exterior”**

MANERA ta conoci Parlamentario Benny Sevinger di AVP ta un sospechoso den e caso Avestruz. E ta keda sospecha di 5 punto y Tromp-Lee ta cita manera esakinan a keda poni den e Beschikking Huiszoeking: - Valsheid in geschrifte, - Oplichting, - Aannemen van steekpenningen (al dan niet handelend in strijd met zijn plicht), - Misbruik van functie y – Opzettelijk/Gewoonte witwassen.

Ta conoci cu no ta existi un ley cu ta prohibi cu un parlamentario por keda den funcion si e ta bira sospechoso den un caso cu ta bou investigacion, pero mirando e gravedad di e acusacionnan ta bon pa Parlamento tuma un postura den e caso aki. Segun Tromp-Lee como representante di pueblo semper mester percura pa na tur momento manda e señal cu Aruba no kier ningun tipo di scandal y corrupcion mas. P'esey mes Tromp-Lee ta di opinion cu ta na su lugar cu investigacion ta keda haci pa por trece luz den tur e specula-

cion y acusacionnan cu pueblo a bin ta tende pa basta tempo. Si resulta cu esakinan ta basa riba realidad, esnan responsabel mester carga nan responsabilidad.

Esaki ta di dos investigacion grandi encuanto corrupcion cu ta tuma lugar caminda un miembro di Gabinete Mike Eman ta involvi. Ya ex minister di AVP señor Paul Croes a keda condena y awor su caso ta den apelacion. Awor ta Parlamentario Benny Sevinger tambe ex minister di Gabinete Mike Eman ta sospechoso y ta keda investiga.

Mirando e situacion aki nos Fraccion di MEP ta di opinion cu en espera di e resultado di e investigacion y tanten cu un parlamentario ta un sospechoso, e no por representa Parlamento di Aruba den exterior. Esaki a keda presenta den comision central di Parlamento y a keda dicidi cu Benny Sevinger no por bay Parlatino pa representa Aruba den e siman cu ta bin.

**SINTONISA TUR MERDIA,
 RADIO GALACTICA 99.9
 PA SCUCHA NOTICIA PRESENTA PA**

**VICTOR (TOKO) WINKLAAR,
 ALEXA WERLEMAN Y SIMON ARENDS.**

DN Den Noticia

GFM 99.9

Parlementario Edgar Vrolijk (MEP): Benny Sevinger, GROUNDED!

“Diabierna ultimo un gran mayoria den parlamento a pone e integridad moral na prome lugar”

DIABIerna ultimo parlamento den su mayoria a marca historia door di dicidi den Comision Central pa no permiti parlamentario Benny Sevinger bay Parlatino y representa parlamento di Aruba mientras cu den un caso hudicial e ta e sospechoso principal di labamento di placa, maluso di su funcion, valsheid in geschrifte, aannemen van steekpenningen y oplichting.

Integridad den parlamento

Den pasado parlamento a ser tilda di ta e organo cu ta permiti bagamunderia di corrupcion. Un ehempel ta e caso di ex Minister Paul Croes unda parlamento (fraccion di AVP) a demostra di ta parti di falta di integridad na momento cu a cambia e ley di integridad pa acomoda un minister cera na KIA pa e por keda minister. Alabes a ser demostra cu e instrumento cu parlamento tin pa duna un mocion di desconfiansa no ta ser aplica poniendo asina un nubia scur di berguensa pa parlamento di Aruba. Awe maske un grupo grandi ainda ta sostene e falta di integridad den e organo di mas halto di Aruba, e prome stapnan den e bon direccion a ser poni caba.

Integridad moral ta bay prome

Diabierna ultimo tabatin debate huridico pero e debate mes cu no a ser haci ta e Integridad moral y sigur e funcion di ehempel pa comunidad. Un parlamentario recientemente a pidi su retiro pasobra el a wak Netflix y awe un cu no conoce integridad moral di ta un sospechoso den un caso mas grandi cu di ex Minister Paul Croes ta keda sinta den parlamento y alabes kier representa Aruba den exterior cu pa e pueblo ta un berguensa. P’esey diabierna un gran mayoria a pone e integridad moral na prome lugar, pero lastimamente no por bisa esey di tur pasobra hopi kier sconde tras di e parti huridico pa por defende maldad.

Parlamento mester ta e ehempel

Pa implementa integridad parlamento mester duna e ehempel na pueblo. Y sin cu tin un base legal ainda pero cu den e ley di iniciativa di integridad di Minister nan, organo di conseho a duna pa laga esaki conta tambe pa parlamentarionan y den bista di locual a pasa diabierna ta muera cu debi na falta di integridad moral mester bay anca esakinan den ley pa duna pueblo tranquilidad.



Parlamentario Alan Howell:

Contento cu awo 512 persona por cumpra nan cas tan anhela


DIABIERNA mainta Parlamento di Aruba a aproba unanimamente e ley pa 512 persona por cumpra nan cas conoci den boca di pueblo como “Cas di Pueblo”, ubica den diferente barrio rond Aruba.

Parlamentario di POR, Alan Howell ta masha contento cu despues di tanto aña finalmente e ley aki a bin cu ta permiti famianan por cumpra nan cas.

Despues di e reunion el a expresa cu “Un di e meta-nan cu mi a bringa duro pa logra na momento cu mi a drenta Parlamento y bira vice presidente di Parlamento ta esaki. Ciudadanonan wardando fo’i 1995, awo tin e oportunidad pa cumpra nan mesun cas. Un soño di hopi cu awe ta bira realidad”.

E barionan unda e casnan aki ta ubica ta Brazil/Mabon, Village, Esso Heights, Pos Chiquito, Rooi Congo, Resedastraat, Louise de Cologny Straat, Maria v Oranjestraat, Savaneta, Cas Paloma, Sero Tijshi, Canashito, Sabana Blanco, Dakota, Tarabana, Madiki, Jaburibari, Noord entre otro. Pa mas informacion esnan interesa por tuma contacto cu FCCA.

Finalizando Howell a gracidi Minister Otmar Oduber y FCCA pa haci e meta aki bira un realidad. “Pabien!”



Cupo ta limita p’e di 3 edicion di Diabetes Walk & Run 2019, registra awe mes!

AINDA bo por inscribi p’e di 3 edicion di “Diabetes Walk & Run 2019”. E evento ta pa trece conocimiento di World Diabetes Day y di diabetes como un malesa. Na Aruba, aproximadamente 16% di e poblacion tin diabetes, esaki ta dobel di e averahe di mundo cu ta 8%.

E evento lo ta parti den 5 categoria: 10 KM Run, 5 KM Walk & Run, 1,5 KM Kids Run, 1 KM Kids Run & 500 Meter Kids Run cu premionan pa cada categoria. E Walk & Run lo wordo documenta cu un BIB-chip p’asina forma parti di e evento #20 di Patrishi Nation-

al Ranking y evento #13 di Kids Ranking.

Tur participante lo ricibi un Dri-Fit shirt conmemorativo di e walk & run.

E evento lo tuma lugar na Botica di Servicio Eagle cuminsando di 6 am diadomingo, 10 di november. E adres ta Caya Punto Brabo 17 bandi SVB Eagle. E “walk and run” ta yegando su capacidad. Pa segura bo lugar den e evento, haci bo pago mas pronto cu ta posibel pasobra bo participacion ta solamente garantisa ora e pago wordo ricibi. Inscripcion por wordo haci na IBISA, Patrishi Sports of online.

Presentacion, workshops y excursion a duna participantenan un drive nobo

Riba tereno di conservacion di naturalesa



KRALENDIJK – Durante e convencion di Dutch Caribbean Nature Alliance (DCNA) di e aña aki cu a tuma lugar recientemente na Bonaire, biologonan di nos region a topa pa papia riba diferente topico: Restauracion di coral, Plan di Accion pa Coral, e plataforma cientifico Observation.org y e proximo peticion pa proposicionnan di investigacion cientifico di e Organizacion Hulandes pa Investigacion Cientifico (NWO).

Banda di tabata presente n’e presentacion y workshopnan, e biologonan di, e.o., e 6 parkenan nacional di Caribe Hulandes a participa na un excursion durante cua nan por a mira e trabounan di restauracion di coral di Reef Renewal Foundation na Bonaire cu nan propio wowo.

Informacion detaya tocante rescate di coral

E biologonan di e parkenan ta dispone awor di mihor informacion tocante ki ora y con pa aplica metodonan di restauracion di coral. Esaki danki n’e hecho cu e presentacion y workshopnan a brinda un oportunidad unico pa siña di otro su conocimiento y experiencia. E conocimiento nobo cu e biologonan a caba di adkiri sigur lo ta di beneficio p’e trabounan haci n’e otro islanan.

“Ta hopi inspirativo pa mira kico ya caba ta haciendo na Bonaire y pa siña di e experiencianan di e otro islanan. Tabata bon tambe pa haya sa ki tipo di cono-

mento ta disponibel y con ta haci esaki disponibel pa medio di metodologianan desaroya.” Jessica Berkel di STENAPA (St. Eustatius) a comenta.

Charla ta laga sentimentonan mixto atras cerca participantenan

E charla pa publico a causa sentimentonan mixto cerca esnan cu tabata presente. Basa riba standardnan cientifico, e status di rifnan di coral den Caribe Hulandes ta modera pa desfavorabel. Esaki ta nifica cu mester tuma medidanan urgente. E concideracion principal ta cu status di e rifnan di coral ta crucial p’e prosperidad duradero di e islanan riba termino largo. P’esei e forsa di boluntad pa tuma accion y preveni cu nos rifnan di coral ta bay atras mas tanto ta hopi fuerte n’e momentonan aki. Den e añanan benidero DCNA lo enfoca riba rescate di coral tambe.

Explorando posibilidadnan pa colaboracion entre e islanan

Arjan de Groene di World Wildlife Fund (WWF-NL) a duna un workshop tocante e Plan di Maneho pa Naturalesa, incluyendo e Plan di Accion pa Coral cu actualmente ta desaroyando pa islanan BES.

E workshop a brinda un plataforma valioso pa participantenan duna input riba con pa implementa e plan aki exitosamente. Aruba, Corsou y St. Maarten tambe por a duna input riba posibel colaboracion entre e seis islanan den futuro.

Pa asesinato di Hulandes Molenaars

Demanda di total 67 aña pa trio atracado y asesino

WILLEMSTAD. Rumannan Richendrick y Jonathan Hansen hunto cu Ruwensly Pisas pa casonan di atraco y tambe asesinato di e Hulandes Europeo Ronaldus Wilhelmus Molenaars (53) den e barío Schelpwijk.

Na final di tratamento dje caso fiscal a pidi un total di 67 aña di castigo di prizon pe acusadonan.

Diabierna den oranan di mainta hues mr. drs. S.M. van Lieshout a cuminsa cu tratamento di e caso di 3 hoben responsabel pa varios acto criminal comete entre cua atraconan arma, menasa, posesion di arma di candela y finalmente asesinato.

Por ehempel den e barío Steenrijk/Heelsumstraat, nan a tira atracado drentando cas di famia exigiendo placa, romel den e cas, bolter tur cos ariba abou, buscando, placa, prenda y otro cosnan di balor.

Tambe e hobennan aki a tira atracado riba algun siudadano di origen Chines, pero pio ainda ta esun caminda nan a tira e homber Hulandes Europeo di fam Molenaars di 53 aña di edad mata den su apartamento aya na Schelpwijk. Nan tabatin hende totalmente robes na bista.

Hues drs.mr. van Lieshout a para ampliamente keto na e circunstancia social di cada un di e sospechosonan aki.

Ta trata aki di e rumannan

Richendrick (19 aña di edad)

Jonathan Hansen (22 aña di edad)

Ruwensly Pisas (22 aña di edad).

E hues minuciosamente tabata repasa e verbalnan y otro documentonan di importancia cu a subi mesa durante tratamento di e caso y tabata tira un lus riba loke a sosode. Mesora a capta atencion e circunstancia doloroso y problematico na cas.

Por ehempel e hecho cu a bini padilanti cu e acusadonan Hansen ta cuater ruman homber y tres ruman muhe, tur ta bon conoci di husticia.

Richendrick como su ruman mas grandi Jonathan Hansen a keda condena den pasado caba. E acusado Ruwensly Pisas ta un mucha homber cu nunca no a conoce su tata, esaki nunca no a reconoce y asina ey el a sigui ta carga fam di su mama.

Remarcabel ta cu e hobennan aki sinta den sala di corte diabierna tabata benta falta riba otro, pero Jonathan Hansen ta esun cu ta ser considera como esun cu a tira e homber Molenaars mata.

Sinembargo Jonathan Hansen a pretende cu e tabata chauffeur di e vehiculo cu nan a uza pa tira e atracado, como



tal e ta pretende di no sa nada di e asesinato.

ASESINATO A KEMAROPA

E atracadonan a bay na un apartamento na Caya Karko, caminda direpente e victima Molenaars a habri porta topa cara, cara cu un di e atracadonan cu a tir'e mata cu un solo tiro di e arma di candela. Al instante Molenaars a muri.

Tin papia cu ta Jonathan Hansen a tira, pero esaki a sigui nenga redondamente.

Ounke e acusadonan tabata solamente nan tres den sala di corte diabierna, ta parse cu tabatin mas ciudadano (atracado) involvi den e actonan castigabel comete, pero ningun no kier a bisa ta ken e otro culpabelnan ta.

Jonathan Hansen na bos halto a recomenda hues pa puntra e acusado Ruwensly Pisas, pasobra lo ta trata aki di su amigonan, kendenan ela trece den wega.

Di su parti Jonathan Hansen a sigui nenga redondamente pa menciona number di e otronan meti den e actonan castigabel comete, pasobra lo tin repercucion den caso si e papia.

Hecho ta cu testigonan tambe a indica cu ta trata aki di varios persona, sigur mas cu tres atracado, tur cu caranan tapa y cu armanan di candela revolver y pistol den man. Debi cu e acusadonan tabatin castigonan bieu cologa riba nan cabes nan tabatin mas cu un abogado pa hiba e defensa.

ABOGADONAN DEFENSOR

Jonathan Hansen tabatin abogadonan señora mr. T. Smeulders y mr. Adelbert Rooijer.

Su ruman Richendrick Hansen tabatin abogado Russel Martis pa dos caso nobo y bieu.

E acusado Ruwensly Pisas mester a conta pa su defensa tanto den su casonan nobo como bieu full cu cooperacion di mr. Roy Gonet.

Caso di atraco y accidente di trafico

WILLEMSTAD - Diasabra 2 di november 2019, alrededor di 04.35'or, Central di Polis a ricibi informacion cu den area di Sto. Domingoweg tin un homber drumi abou tur na sanger.

For di un investigacion preliminar cu polis a haci na e sitio, e victima a declara cu e tabata na un sitio di diberticion den area di Brievengat. Na momento cu e tabata bay cas dos homber desconoci pe a pidie un lift. Nan a drenta den su SUV pa bay for di sitio.

Diripiente e hombernan desconoci pe a atrak'e y maltrat'e pa despues lag'e herida canto di caminda y bay cu su SUV. Ambulans a transporta e victima pa policlinica di SEHOS pa tratamento medico.

Alrededor di 04.34'or Central di Polis a haya notificacion di un accidente cu a tuma luga cu un SUV na Plaza Hariri.

For di un investigasho cu polis a haci na e sitio a resulta cu probablemente chauffeur di e SUV a perde control riba e vehiculo pasa riba e rotonde pa despues bay bolter. Ambulans a transporta e victima pa policlinica di SEHOS, caminda despues di tratamento e la keda interna.



Continuando cu e investigacion polis a haya y confisca pertenencianan di e victima di Sto. Domingoweg den sacu di carson di e victima na rotonde Palo Blanco. Tambe a resulta cu e SUV cu a accidenta ta pertenesce na e victima di Sto. Domingoweg.

Polis a detene na hospital e homber sospechoso L.A.S.C., naci na Colombia di 21 aña di edad, relaciona cu e atraco y maltrato ariba menciona.

A presenta e sospechoso dilanti di un fiscal auxiliar, cu a ordena su encarselamento pendiente di mas investigacion.

Accidente cu morto

WILLEMSTAD - Diabierna 1 di november 2019, alrededor di 19.23'or Central di Polis a ricibi notificacion cu na un cas den Caya Vatu un vehiculo a cai riba un homber cu tabata drecha e vehiculo.

E prome unidad policial cu a yega na e sitio a topa cu un homber herida drumi abou. Ambulans a transporta e victima den situacion di preocupacion pa policlinica di SEHOS pa tratamento medico mas avansa.

Central di Polis a ricibi notificacion alrededor di 22.45'or cu docter di polis a constata morto di e homber Jefferson Erwin Thomas Wolff, naci na Corsou 3 di juli 1977, na St. Elisabeth Hospital.



Trio detene pa atraco y confiscacion

WILLEMSTAD - Diasabra dia 2 di november 2019, alrededor di 06.04'or, Central di Polis a ricibi informacion di un caso di atraco cu tabata tumando luga na un establecimiento di Horeca den area di Zuikertuintje.

Na yegada di e unidad, ya e sospechosonan a bay for di e sitio cu algun pertenencia di e victima.

Continuando cu e investigacion, unidadnan tanto di e team di Mantencion di Ordu Público como esun di warda di Punda a bay den Oranjestraat unda nan a bin topa cu dos homber sinta den un hanchi. Na momento cu nan a mira polis, un di nan a core dreña un cas, mientras e otro nan tambe a trata di core bai, pero a keda detene na e sitio.

Durante control den un cura di cas djis ey banda, polis a bin topa e pertenencianan di e victima di e



caso di atraco aki memeyi di algun bola di sushi. Patras di e cas na unda e otro sospechoso a core bai, a bin topa un arma di candela.

Durante di un entrada hudicial cu a sigui, a logra e di tres sospechoso. Mas despues e investigacion a produci diferente articulo, prosedente di otro casonan di atraco y ladronia cu tambe ta den investigacion.

Personal di e team di Atraco cu tambe tabata na e sitio, ta continua cu e investigacion.

A presenta e trio sospechoso, e hombernan S.H.C., D.A.D. y M.K.B. di respectivamente 16, 22 y 30 aña, tur tres naci na Corsou dilanti di un fiscal auxiliar, cu a ordena nan encarselamento pendiente di mas investigacion.

Morto relaciona cu explosion



WILLEMSTAD - Diabierna 1 di november 2019 Polis a ricibi informacion, cu e victima enbolbi den e caso di explosion cu a tuma luga na un cas den area di Habai dia 24 di october último a fayece na Colombia.

Ta trata di e dama , Lupirta Maria De Palm, nace na Corsou dia 22 di juni 1979 (40 aña). Paz na su restonan

Royal
Aurora
Funeral Home & Crematory

Gradicimento/Invitacion

Pa medio di esaki, famia kier agradeci tur esnan cu na un manera of otro a duna nos sosten, consuelo y forza durante e tempo dificil cu e fayecimento y entiero di nos defunto stima:



Sr. Benancio Obispo
"Shonaka" Angela

Alavez ta invita tur famia, bisinja y conociman pa 3 Santo Sacrificio di misa cualnan lo tuma lugar ariba:

Diasabra, 2 di November 2019 na misa Santa Anna na Noord pa 7' or di anochi

Diamars, 5 di November 2019 na kapel di Alto Vista pa 5.30 di atardi

Diasabra, 9 di November 2019 na misa Santa Anna na Noord pa 7' or di anochi

Royal
Aurora
Funeral Home & Crematory

Gradicimento/Invitacion

Pa medio di esaki nos kier a gradici tur esnan cu di un manera of otro a demostra nan atencion durante e momemto nan dificil di fayecimento y entiero di nos ser stima:



MARIO HAROLD EVERON
Carinosamente jama "MAI"

Un danki special na Dokter Kock, Dokter Cuba y Dokter Garcia di Dialyse Afdeling Hospitaal. Zusterman di Dialyse Afdeling na Hospitaal.

Lite Life Transport. Un danki di curazon na henter famia, amigo/a nan y conociman cu a companja nos durante entiero di nos ser stima.

Un danki na tur esnan cu a manda flor, krans, cu a jama, manda mensahe of kaarchi.

Un danki na Aurora Funeral Home pa nan bon servicio. Nos kier a invita pa companja nos na un Santo Sacrificio di Misa cu ta tuma lugar:

Diamars 05 November 2019 pa 7.00 pm na Misa Inmaculada Concepcion na Santa Cruz. Despues di Misa lo tin un resamento na cas Piedra Plat 143-D

Boso presencia lo ta altamente aprecia. Den number di su Senora vuida Miriam Everon-Lopez y su juinan.

Royal
Aurora
Funeral Home & Crematory

Mi Dios, Mi Señor, Mi Salvador
Cu Bo amor infinito tenemi den Bo braza
Ya no tin scuridad
Unicamente Bo Luz briyando

Cu inmenso tristesa na nos curason,
pero conforme cu voluntad di Dios nos ta participa fayecimento inesperadamente di:



Sr. Ronald Genaro Kootes
Mihor conoci como "Ronny"
*10-07-1962 - †29-10-2019

Na number di su:
Casa: Odette Kootes-Dirksz
Mayoran: †Otilio y †Marina Kootes
Suegro y suegra: Profilio y †Susana Dirksz

Yiunan: Bryan Kootes
Meraly Kootes
Jason Kootes y Randeline Berry

Nietanan: Emelly Kootes
Kimia Kootes

Subrino (a) nan: Djon Kootes
Michell Valentina M. Millan

Iha: Cristaly Werleman
Michell Valentina M. Millan
Rumannan: Gregory y Zulay Kootes-Millan
Albertico y Compañe Wichman

Tanta y Omonan
Comer y Comper: Mildred Dirksz-Dania, Polinario Danje
Swanan: Profilio Dirksz y Famia, Anthony Dirksz y Famia, Teofilo Dirksz y Famia, Leoncio Dirksz
Primo y primanan y bon bisñanan.

Amigo di cas: Rene Kock
Amigonan cu ta mucho pa menciona.
Ex coleganan di: Oduber Agencies N.V.
Team di Football: SV Estrella, SV Arsenal y SV Sport-boys.
Team di Bowling: Total Finance.
Team di Softball: Astro's Vets.
Bow Palo gang.

Demas famia: Kootes, Dirksz, Maduro, Cornelie, Brion, Chirino, Dennert, Jansen, Koolman, Geerman, Erasmus, Wernet, Ras, Bikker, Thiel, Boekhoudt, Danjo, Danje, Dania, Curiel, Werleman, Bello, Arendts, Tromp, Pue, Wah, Russel, Willems y demas famia di Aruba y Curaçao.

Ta invita bisiña, amigo y conocinan pa asisti na e acto di despedida cu lo tuma luga Diamars 05 di November 2019. E resto mortal lo ta esposa den Misa Inmaculada Concepcion for di 2'or pa 4'or.
Condolencia lo ta na Cas Ariba 35-A Dialuna 04 di November 2019 di 7'or pa 9'or di anochi.
Despensa nos si den nos tristesa cu nos por a lubida algun famia.

Royal
Aurora
Funeral Home & Crematory

Laga tur loke ta spera mi ta bunita
Laga tur locual cu mi encontra na caminda ta bunita
Laga tur locual cu mi laga atras keda bunita y
Laga esakinan termina den tur buniteza.
Cado Wever.

Cu dolor na nos curason,
nos kier anuncia fayecimento di:



Douglas E. Tachi
Mihor conoci como "Tachi"
*31-10-1952 - †31-10-2019

Na number di su:
Pareha: Irena Geerman

Yiunan: †Douglas E. J. Tachi
Leroy y Diana Tachi
Anouska y Reimur Bermudez
Denny Geerman

Nieta y Nietonan: Leeray Tachi y Bas de Ruijter
Roswin Tachi y Amanda Fabus
Joshua Tachi y pareha
Joshwin Tachi
Maria Sarahi Bermudez
Shaloom Bermudez
Isaac Bermudez
Mia Isabella Tachi

Bisanieto(a)nan: Neariah Tachi
Yuniti Ruijter
Owyn Tachi

Rumannan: †Lourdes Koeiman y famia
Catharina Barkmeyer y yiu
Dulcita Tache y famia
Jose Tache y famia
Ramon Tache y famia
Luz Tache y famia
Amanda Tache y famia
Edwin Tache y famia
Lugdwin Tache y famia
Morela Tache y famia

Sobrino- y sobrinanan, primo- y primanan , amigonan y demas famianan y conociman

Si encaso cu den nos tristesa nos por a lubida algun famia of conoci nos ta pidi nos mas sincero disculpa.

Ta invita pa asisti na acto di entiero cu lo tuma lugar diamars 5 di November 2019 for di 9'or pa 11'or di mainta na Aurora Funeral Home. Despues lo sali pa santana Sta. Maria na St. Cruz.

Enbes di flor of krans lo tin un box disponibel pa donacion pa Fundashon Paraiso.

Ta duel nos cu despues di entiero nos no por ricibi bishita di condolencia na cas.



E unico corant GRATIS



Abona awo

Manda un e-mail na:

Noticia@awemainta.com

y skirbi e palabranan: *"Ami Kier Abona"*

Like nos riba facebook

Keda "up to date" y like nos riba facebook
www.facebook.com/awemainta



Subi riba nos website

www.awemainta.com

AWEMainta completamente

DIGITAL